

Bosna i Hercegovina

Federacija Bosne i Hercegovine

Tuzlanski kanton

OPĆINA GRAČANICA

OPĆINSKO VIJEĆE

Broj predmeta: 01-05-04236-2013

Broj akta: 01EH-001

Gračanica, 26. 12. 2013. godine

Z A P I S N I K SA 14. SJEDNICE OPĆINSKOG VIJEĆA GRAČANICA

Održane dana 28. 11. 2013. godine u sali za sjednice nove zgrade Općine, sa početkom u 11.00 sati.

Sjednici je prisustvovalo svih 30 članova Općinskog vijeća Gračanica.

Sjednicu je zakazao i istom predsjedavao Ibrišević Edin, predsjedavajući Općinskog vijeća Gračanica, zajedno sa zamjenikom Gazibegović Seadom i sekretarom Općinskog vijeća Mujačić Zehrom.

Zapisnik vodila Mevlida Naimkadić, a vršilo se i tonsko snimanje sjednice.

Prije početka sjednice predsjedavajući Vijeća je upoznao prisutne da sjednici prisustvuju i učenici srednje medicinske škole Gračanica koji će podijeliti oznake u znak obilježavanja Svjetskog dana borbe protiv AIDS-a, koji se obilježava 1. decembra.

Pored članova Općinskog vijeća sjednici su prisustvovali i: Općinski načelnik Nusret Helić, Azra Mustajbašić, savjetnik načelnika za odnose sa javnošću, općinski pravobranilac Jasminka Imširović, šefovi službi za upravu Senaida Šaković, Aida Hodžić, Zijad Dedić i Mustafa Bajić, izvjestioci, Fernada Helić-Čamdžić, Samed Topčagić, te predstavnici sredstava informisanja.

Zapisnik sa 13. sjednice Općinskog vijeća Gračanica usvojen je jednoglasno bez primjedbi sa 30. glasova "ZA".

Pitanja i inicijative kandidovali su:

Mešić Fadil:

"U naselju Bazen već duže vrijeme oborinske vode pričinjavaju velike muke stanovnicima Bazena. obraćali su se, kako kažu, svima nadležnim i niko do sada da to riješi. Usljed većih kiša dolazi do poplave u podrumne kuće ovim gore stanovnicima. Gosp. Načelniče šta vi možete učiniti da se ovaj problem naselja Bazen riješi?"

Esad Tursunović:

"Jedno vijećničko pitanje odnosi se na JP "Komus" Gračanica. Veliki broj građana je pitao za prošli vašar. Njih interesuje finansijski izvještaj, odnosno kako se završio što se tiče naplate? Stoga, molim predstavnike JP "Komus" da nam dostave kompletan finansijski izvještaj".

Mirsada Osmić:

“U ime građana i u svoje lično ime podnosim inicijativu, a odnosi se na:

1. Postavljanje ulične rasvjete od Čitaonice Javor i duž ulice Braće Fazlića do mosta pred Kamenolom.

Obrazloženje: Građani MZ-e Lendići kao i drugih naselja prinuđeni su da svoju djecu odvođe i dovode prema školi i gradu, naročito u zimskom periodu, jer je dan kraći, a to predstavlja poteškoće kako za njih pješake tako i za druge učesnike u saobraćaju. Na dionicama puteva gdje je zbog nepostojanja rasvjete vidljivost smanjena dovodi se u pitanje sigurnost, prije svega djece. Zato predlažem da se obrati pažnja prema pomenutoj kao i drugim ulicama gdje za sada ne postoji ili rasvjeta nije u funkciji i u ime građana tražim da se taj problem riješi u što skorijem vremenu.”

Esma Pašić:

“Prvo da se zahvalim načelniku i Stručnoj službi na dostavljenom odgovoru na moja dva pitanja upućena na prethodnoj sjednici.

Ja upućujem jednu vijećničku inicijativu prema načelniku općine Gračanica.

Inicijativa se odnosi na popravku ili rekonstrukciju pješačkog mosta koji se nalazi kod Sportske dvorane “Luke”.

Obrazloženje: Navedeni pješački most služi za prelazak učenika i ostalih pješaka iz pravca naselja Luke i naselja Hajdarovac prema Drugoj osnovnoj školi u Gračanici. Most je u dosta lošem stanju, gornja ploča je skroz natruhla i svakog momenta može doći do pucanja. Obzirom da navedenim pješačkim mostom svakodnevno prolaze učenici koji odlaze na redovno pohađanje nastave, u ovakvom stanju prelazak preko mosta može biti opasan po život za učenike i ostale pješake. Želim da napomenem da investicija popravke mosta ne bi iznosila više od nekih 300,00 do 400,00 KM.”

Mirza Omerdić:

“Ja imam jednu vijećničku inicijativu upućenu načelniku. Dakle, radi se o našem MNK “Kaskada”. Razgovarao sam sa sekretarom MNK “Kaskada” koji je iznio jako tešku situaciju. Oni utakmice finansiraju otprilike nekakvim donacijama i jako su, jako u teškom položaju i svaka utakmica zavisi od toga koliko donacija oni dobiju. Zamolili su me da dam inicijativu da se pokuša pomoći ovom klubu s obzirom da je on “pored “Bratstva”, jedna svijetla tačka u našem gradu i puno radi na promociji Gračanice. Dakle, bilo bi fino i pohvalno i potrebno da im se pomogne, naravno ukoliko je to moguće.”

Ibrahim Hasić:

“Ja bih samo rekao da nisam dobio odgovora na postavljeno pitanje na prethodnom vijeću, pa evo isto pitanje obnavljam i nadam se da bi trebao do narednog vijeća, odnosno materijala da pristigne. Ukoliko ne, onda moram mijenjati adresu.”

Almedin Devedžić:

“Ja bih uputio načelniku dva pitanja. Pošto je evo krenula zimska sezona ona glase:

1. Da li su izmirene obaveze Općine Gračanica prema licima koja su u kalendarskom zimskom periodu 2012/2013. vršila usluge zimskog održavanja puteva u mjesnim zajednicama?

2. Da li je obezbijeđen i distribuiran posipni materijal i so za zimsko održavanje puteva u mjesnim zajednicama u zimskoj sezoni 2013/2014. god.?”

Himzo Avdić:

“Prije četiri mjeseca sam uputio pitanje Direkciji za ceste TK za javnu rasvjetu u Stjepan Polju i nisam dobio odgovor na to pitanje, a to je bilo prije četiri mjeseca. Da li je to do naše službe ili njihove, želim odgovor?”

Mirzet Topčagić:

“Ja sam član “Kaskade” i ostavio sam jedan dio života u MNK “Kaskada” i zahvaljujem se kolegi Omerdiću na inicijativi, ali moram da kažem da je gospodin načelnik u proteklom periodu u dosta toga pomagao “Kaskadu”. Mislim da “Kaskada” to zaslužuje, kako kroz utakmice tako i učestvovanja na takmičenjima i da i načelnik i ovo vijeće treba da pruže podršku ovom klubu”.

Predsjedavajući Vijeća je odgovorio na pitanje Avdić Himze uz konstataciju da će se ponovo dostaviti pitanje u Direkciju za puteve TK.

Općinski načelnik je odgovorio na pitanje oko zimske službe i izmirivanja svih obaveza prema onima koji su obavili taj posao, zatim na pitanje oko nabavke posipnog materijala-soli za nastupajuću zimsku sezonu. Isto tako je odgovorio i na inicijativu Omerdić Mirze oko finansijske podrške MNK “Kaskada”, naglašavajući da će se i od sada podržavati ovaj klub, kao i ostali i da neće doći to u pitanje.

Prešlo se na raspravu o predloženom dnevnom redu 14. sjednice Općinskog vijeća Gračanica. Učenici srednje medicinske škole su se zahvalili Vijeću na podršci u obilježavanju 1. decembra, Dana borbe protiv AIDS-a.

Nije bilo učesnika u diskusiji i dnevni red 14. sjednice Općinskog vijeća Gračanica je usvojen jednoglasno a glasi:

1. **AKCIONI PLAN ZA UNAPREĐENJE POLOŽAJA ŽENE U RURALNIM PODRUČJIMA OPĆINE GRAČANICA ZA PERIOD 2014. – 2016. GODINA**
Izjavitelj: Fernada Helić-Čamdžić, šef odjeljenja
(**Napomena:** Opširniji materijal sa CD-om dostavljen je predsjednicima klubova)
2. **IZJAVA O POLITICI ENERGETSKE EFIKASNOSTI I ZAŠTITE OKOLIŠA-SAGLASNOST NA POTPISIVANJE IZJAVE**
Izjavitelj: Topčagić Samed, koordinator projekta
3. **INFORMACIJA O RADU STALNIH RADNIH TIJELA-KOMISIJA OPĆINSKOG VIJEĆA GRAČANICA.**
Izjavitelj: Edin Ibrisević, predsjedavajući Općinskog vijeća
4. **RJEŠENJA I zaključCI Imovinsko-pravne službe**
Izjavitelj: Aida Hodžić, šef Službe

TAČKA 1:

AKCIONI PLAN ZA UNAPREĐENJE POLOŽAJA ŽENE U RURALNIM PODRUČJIMA OPĆINE GRAČANICA ZA PERIOD 2014.- 2016. GODINA

Učesnici u raspravi po prvoj tački dnevnog reda su:

Hasić Mujo:

„Klub vijećnika SDP-a podržava Akcioni plan za unapređenje položaja žene u ruralnim područjima općine Gračanica za period 2014.-2016. godina. U iščitavanju ovog materijala, ustvari i prije čitanja neke stavari sam zapazio i ovdje pročitao, a to je recimo da Općina Gračanica zaista ima da kažem, senzibiliteta prema ženama. I od devet nekih rukovodećih mjesta na području općine Gračanica pet rukovodilaca su žene, a četiri su muškarca. Znači, s te strane posmatrano zaista u tom segmentu Općina Gračanica daje podršku i njeguje rad nježnijeg spola. Isto tako u tom materijalu je navedeno da pomoć ženama u ruralnim područjima ogleda se znači i kroz rješavanje infrastrukturnih problema, kao što su putevi, ulična rasvjeta i neke druge stvari kao i KUD-a, kojih nažalost na području mjesnih zajednica ima još uvijek jako malo. Ono što bih ja želio kao pomoć ženama iz ruralnih područja općine Gračanica, da im bude i to da se pokuša onim osobama koje donose svoje poljoprivredne proizvode i prodaju na zelenoj pijaci, u onako da kažem katastrofalnim uslovima, da im se pomogne i kroz poboljšavanje uslova na zelenoj pijaci ili kroz davanje besplatnih štandova za one osobe koje donose malo mlijeka, malo sira, malo celera i sl. da zarade neku dnevnicu od 20,00 do 30,00 KM, a to potroši u prvom tržnom centru idući do svoje kuće. Znači, minimalno što bi mogla Općina uraditi za njih je preko JP „Komus“ Gračanica, normalno subvencionirati „Komus“, da se tim osobama besplatno dodijele ti štandovi za prodaju proizvoda koji su proizvedeni u tim ruralnim područjima. To se naravno neće raditi onima koji komercijalno donose robu iz zemalja i iz raznih evropskih destinacija. Da navedem i to, evo mi svake godine ovdje iz budžeta dajemo kao grant, naravno po osnovu zakona koji važi, recimo JU Dječije obdanište Gračanica, iznose od dvjesto do dvjesto pedeset hiljada maraka za rad tih ustanova, a u ta obdaništa idu djeca, da ne kažem samo djeca čiji roditelji imaju pare. Znači mi te ljude koji imaju još ih subvencioniramo kroz davanje grantova. Slažem se da je to po zakonu, dajemo im pare da bi se njihova djeca ugodnije osjećala, a ovim osobama koje dolazi i kad je minus dvadeset ili petnaest i mrznu se tamo i žele da žive od svog poštenog i čestitog rada, nismo baš dovoljno pridavali pažnje. Evo ja ovom prilikom, uz to da mi podržavamo Akcioni plan, dajem sugestiju Općinskom načelniku da u budžetu za narednu godinu pokušamo naći sredstva kako bi te osobe imale besplatan štand i pristup prodajnim mjestima na našoj zelenoj pijaci. Hvala.“

Selihana Ćurić:

„Klub SDA je razmatrao Akcioni plan za unapređenje položaja žene u ruralnim područjima općine Gračanica za period 2014.-2016. godina i prihvata navedeni plan uz određene primjedbe. Smatramo da generalno žene sa sela i žene iz grada sve više svoje granice sužavaju. Žene sa sela se polako ali sigurno integrišu u društveni život svoje lokalne zajednice, pa i šire i ovi problemi koji su u ovom akcionom planu navedeni, malo su nerealni što se tiče žena sa sela. U njih se mogu svrstati generalno sve žene naše općine. Mjere koje su predložene podržavamo uz napomenu da ove mjere ne budu samo na papiru, nego isključivo da se provedu u praksi.“

Kratku dopunu obrazloženju dala je Fernada Helić-Čamdžić, nakon čega je Akcioni plan za unapređenje položaja žene u ruralnim područjima općine Gračanica za period 2014.-2016. godina, usvojen jednoglasno sa 30 glasova „ZA“.

TAČKA 2:

IZJAVA O POLITICI ENERGETSKE EFIKASNOSTI I ZAŠTITE OKOLIŠA-SAGLASNOST NA POTPISIVANJE IZJAVE

Učesnik u diskusiji po ovoj tački dnevnog reda je Rahim Gadžić:

„Klub vijećnika SDA razmatrao je Izjavu o politici energetske efikasnosti i zaštite okoliša na području općine Gračanica i smatra da je ovo jako dobra informacija i mi je podržavamo kako bi se povećale sve moguće uštede trošenja energije i smanjenje emisije CO². Mi maksimalno podržavamo ovu izjavu i prihvatamo da se da saglasnost Općinskom načelniku i predsjedavajućem Općinskog vijeća da uđu u projekat.“

Nije bilo učesnika u diskusiji a predsjedavajući Vijeća je definisao zaključak koji glasi:

- Daje se saglasnost Općinskom načelniku gosp. Nusretu Heliću i predsjedavajućem Općinskog vijeća gosp. Edinu Ibriševiću, da u ime Općine Gračanica mogu potpisati Izjavu o politici energetske efikasnosti i zaštite okoliša.

Sastavni dio ovog zaključka je tekst Izjave o politici energetske efikasnosti i zaštite okoliša.

Zaključak o saglasnosti je usvojen jednoglasno sa 30 glasova “ZA”.

TAČKA 3:

INFORMACIJA O RADU STALNIH RADNIH TIJELA-KOMISIJA OPĆINSKOG VIJEĆA GRAČANICA.

Predsjedavajući Općinskog vijeća Edin Ibrišević iznio je sljedeće:

„Ja bih dao kratku napomenu da je ovaj saziv vijeća na početku svog mandata odradio jedan dobar posao u smislu racionalizacije, smanjenja broja općinskih komisija i imenovanja onih komisija koje zbilja koriste kao savjetodavni organi Općinskog vijeća. Mi smo sa nekih otprilike devetnaest komisija u ovom sazivu smanjili na sedam. Komisije broje pet članova osim Komisije za etički kodeks. Predsjednici komisija i članovi se izuzetno racionalno ponašaju. Sjednice sazivaju samo onda kada je to potrebno. Mi smo u protekloj godini do sada održali 21 sjednicu komisija. Od toga naravno 13 sjednica je održala Komisija za propise i Statut, koja se sastaje uvijek prije sjednice Vijeća.“

Učesnici u raspravi su:

Ezaneta Hadžić:

„Ja bih pitala, odnosno tražim da mi neko odgovori. Ja sam član Komisije za etički kodeks. Možda nisu svi upoznati, održala je samo jednu sjednicu, dok je druga sjednica zakazivana dva puta i nije održana. Znači ja pitam ko je odgovoran za to? Zašto se te sjednice nisu održale, ako je do predsjednika hajde da mijenjamo predsjednika, a ako je do članova da mijenjamo članove. I evo i Komisija za urbanizam i ekologiju i Komisija za praćenje položaja boračke populacije nisu imale ni jednu sjednicu i to mi je nekako nelogično. I htjela bih, znači od sada kad se zakazuju komisije, ako je moguće u pismenoj formi da mi budemo obaviješteni o toj sjednici kako bi mi svoje aktivnosti mogli prilagoditi toj sjednici.“

Hasan Puškar:

„Imam pitanje, a ponavljat će se sa pitanjem kolegice Ezanete. Zašto Komisija za urbanizam i ekologiju i Komisija za praćenje položaja boračkih populacija nije zasijedala. Ja mislim da su ove komisije imale razloge da zasijedaju. Npr. Komisija za urbanizam je trebala razmatrati Regulacioni plan, odnosno nacrt, a nije zasijedala. I drugo, Komisija za praćenje položaja boračkih populacija nije zasijedala ni jednom i zauzela stav u ime Vijeća, a u proteklih godinu dana je bilo puno protesta i sl. od strane boračke populacije. Ako te komisije neće da rade svoj posao neka kažu i mi ćemo ih zamijeniti sa ljudima koji hoće da rade svoj posao. I ja mislim ako ne žele raditi, predsjedavajući Vi trebate od njih zatražiti pismeno upit i ako neće da ih zamijenimo.“

Vehid Osmanović:

„Mislim da ćemo se ponavljati jer su svi uočili da ima nedostatak. Informacija je takva kakva jeste, a Klub vijećnika SDP-a preporučuje da ove komisije koje nisu održavale sjednice, ili su održale vrlo malo, da intenziviraju svoj rad jer zaista je čudno da čitava godina prođe a da se ne održi ni jedna sjednica. Znači onda se postavlja pitanje da li je ona upošte potrebna. Evo otprilike je isto i što je kolegica Ezaneta rekla, a i kolega Puškar. Trebaju komisije ubuduće intenzivirati svoj rad.“

Predsjedavajući Vijeća je naglasio da prema Poslovniku komisije zakazuje predsjednik komisije u dogovoru sa predsjedavajućim Općinskog vijeća. Ujedno je iznio činjenicu da se dva predsjednika komisija koje nisu održale ni jednu sjednicu nisu obraćali kad je u pitanju zakazivanje sjednice. Nada se da će u narednom periodu predsjednici ove dvije komisije intenzivirati svoj rad kada se nešto u okviru njihovog domena nađe na dnevnom redu Općinskog vijeća.

Nije bilo više učesnika u diskusiji i Informacija o radu stalnih radnih tijela-komisija Općinskog vijeća Gračanica usvojena je jednoglasno sa 30 glasova „ZA“.

TAČKA 4:

RJEŠENJA I zaključCI Imovinsko-pravne službe

Rješenja i zaključak Imovinsko-pravne službe usvojena su jednoglasno bez učesnika u diskusiji sa 30 glasova „ZA“.

Sjednica je završena u 11.50 sati.

Zapisnik vodila: Mevlida Naimkadić

Tonski snimak sjednice uredno je arhiviran.

Mevlida Naimkadić

**PREDSJEDAVAJUĆI
OPĆINSKOG VIJEĆA**

mr.sci. Edin Ibrišević